



商子卷四

來民第十五

地方百里者山陵處什一藪澤處什一谿谷流水處
什一都邑蹊道處什一惡田處什一良田處什四此
食作夫五萬其山陵谿谷藪澤可以給其材都邑蹊
道足以處其民先王制土分民之律也今秦之地方
千里者五而穀土不能處二田數不滿百萬其藪澤
蹊谷名山大川之財物貨寶又不盡為用此人不稱
土也秦之所與鄰者三晉也所欲用兵者韓魏也彼
六狹而民衆其宅叅居而并處其寡萌賈息民上無

通名下無田宅而恃姦務末作以處人之復陰陽澤
水者過半此其土之不足以生其民也以有過秦民
之不足以實其土也意民之情其所欲者田宅也而
晉之無有也信秦之有餘也必如此而民不西者秦
士戚而民苦也臣切以王吏之明為過見此其所以
弱不奪三晉民者愛爵而重復也其說曰三晉之所
以弱者其民務樂而復爵輕也今秦之所以強者其
民務苦而復爵重也今多爵而久復是釋秦之所以
強而為三晉之所弱也此王吏重爵愛復之說也而
臣切以為不然夫所以為苦民而強兵者將以攻敵

而成所欲也兵稱曰敵弱而兵強此言不失吾所以
攻而敵失其所守也今三晉不勝秦四世矣自魏襄
王以來野戰不勝守城必拔小大之戰三晉之所以
忘於秦者不可勝數也若此而不服秦能取其地而
不能奪其民也今王發明惠諸侯之士來歸德就義
者今使復之三世無知軍事秦四境之內陵阪丘隰
不起十年往者於律也足以造作夫百萬曩者臣言
曰意民之情其所生者田宅也晉之無有也信秦之
有餘也必若此而民不西者秦士戚而民苦也今利
其田宅而復之三世此必與其所欲而不使行其所

也然即山東之民無不西者矣且直言之謂也不然夫實墮什虛出天寶而百萬事本其所益多也豈徒不失其所以攻乎夫秦之所患者興兵而伐則國家貧安居而農則敵息此王所不能兩成也故三世戰勝而天下不能令以故秦事敵而使新民作本兵雖百宿於外境內不失須臾之時此富強兩成之效也臣之所謂兵者非謂悉興盡起也論境內所能給軍卒車騎令故秦兵新民給芻食天下有不服之國則王以此春圍其農夏食其食秋取其刈冬陳其寶以大武搖其本以廣文安其嗣王行此十年之內諸侯將無異民而王何為受爵而重復乎周軍之勝華軍之勝秦斬首而東之東之無益亦明矣而吏猶以為大功為其損敵也今以草茅之地來三晉之民而使之事本此其損敵也與戰勝同實而秦得之以為粟此反行兩登之計也且周軍之勝華軍之勝長平之勝秦所亡民者幾何民客之兵不得事本者幾何臣竊以為不可數矣假使王之群臣有能用之費此之半弱晉強秦若三戰之勝者王必加大賞焉今臣之所言民無一日之繇官無數錢之費其弱晉強秦大過三戰之勝而王猶以為不可則臣愚竊不能已

齊子卷四
與曰吾將以求封也其徒怒而去之宋此無益於愛也故不如與之之利也今晉有晉而秦愛其復此愛非其有以失其有也豈異東郭敞之愛非其有以亡其徒乎且古有堯舜當時而見稱中世有湯武在位而民服此三王者萬世之所稱也以為聖王也然其道猶不能取用於後今復之三世而三晉之民可盡也是非王賢力今時而使後世為王用乎然則非聖別說而聽聖人難也

刑約第十六七

賞刑第十七

聖人之為國也一賞一刑一教一賞則兵無敵一刑則令行一教則下聽上夫明賞不費明刑不戮明教不變而民知於民務國無異國明賞之猶至於無賞也明刑之猶至於無刑也明教之猶至於無教也所謂一賞者利祿官爵搏出於兵無有異施也夫固愚知貴賤勇怯賢不肖皆盡其胸臆之知竭其股肱之力出死而為上用也天下豪傑賢良從之如流水夫故兵敵而令行於天下萬乘之國不敢蘇其兵中原一乘之國不敢捍城萬乘之國若有蘇其兵中原者

戰將覆其軍千乘之國若有以捍城者攻將凌其城
戰必覆人之軍攻必凌人之城盡城而有之盡賓而
致之雖厚慶賞何費匱之有矣昔湯封於贊茅文王
封於岐周方百里湯與桀戰於鳴條之野武王與紂
戰於牧野之中大破九軍奔為列諸侯士卒坐陳者
里有書社車休息不乘縱馬華山之陽縱牛於農澤
縱之老而不收此湯武之賞也故曰贊茅岐周之粟
以賞天下之人不人得一勝以其錢賞天下之人不
人得一錢故曰百里之居而封侯其臣大其舊自士
卒坐陳者里有書社賞之所加寬於牛馬者何也善

因天下之貨以賞天下之臣故曰明賞不費湯武既
破桀紂海內無害天下大定築五庫歲五兵偃武事
行文教倒載戟戈搢笏作為樂以申其德當此時也
賞祿不行而民整齊故曰明賞之猶至於無賞也所
謂一刑無等級自卿相將軍以至大夫庶人有不從
王令犯國禁亂上制者罪死不赦有功於前有敗於
後不為損刑有善於前有過於後不為虧法忠臣孝
子有過必以其數斷守法守職之吏有不行王法
者罪死不赦刑及三族周官之人知而謂之上者自
負於罪無貴賤尸襲其官長之官爵田祿故曰重刑

適其罪則民不敢試民不敢試故無刑也夫先王之
禁刺殺斷人之足黥人之面非求傷民也以禁姦止
過也故禁姦姦止莫若重刑刑重而必得則民不敢
試故國無刑民國無刑民故曰明刑不戮晉文公將
欲明刑以親百姓於是合諸侯大夫於侍千宮顛頡
後至請罪君曰用事焉吏遂斷顛頡之脊以殉晉國
之士稽馬皆懼曰顛頡之有寵也斷以殉况於我乎
舉兵伐曹五鹿及反鄭之埤東徵之畝勝荆人於城
濮三軍之士止如斬足行之如流水三軍之士無敢
犯禁者故一假道重輕於顛頡之脊而晉國治昔者
周公旦殺管叔流霍叔曰犯禁者也天下衆皆曰親
昆弟有過不違而况疏遠天下乎蓋公旦用刀鋸於
周庭而海內治故曰明刑之猶至於無刑也所謂一
教者博聞辯慧信廉禮樂修行羣黨任譽清濁不可
以富貴不可以評刑不可獨立私議以陳其上堅者
被銳者挫雖曰聖智巧佞厚朴則不能以非功罔上
利然貴富之門要存戰而已矣彼能戰者踐富貴之
門湯梗焉有常道而不禁是父兄昆弟知識婚姻合
同者皆曰務之所加存戰而已矣夫故當壯者務於
戰老弱者務於守死者不悔生者務勸此臣之所謂

一教也民之欲貴富也共闔棺而後出而貴富之門
必出於兵是故民間戰而相賀也起居飲食所歌謠
者戰也此臣之所謂明教之猶至於無教也此臣所
謂叅教也聖人非能通知萬物之要也故其治國舉
要以致萬物故寡教而多功聖人治國也易知而難
行也是故聖人不必王凡主不必廢殺人不為暴賞
人不為仁者國明也聖人以功授官予爵故賢者不
憂聖人不宥過不赦刑故姦無起聖人治國也審一
而已矣

畫策第十八

昔者昊英之世以伐木殺獸人民少而木獸多黃帝
之世不麇不郊官無供備之民死不得用槨事不同
皆王者時異也神農之世公耕而食婦織而衣刑政
不用而治甲兵不起而王神農既沒以強勝弱以衆
暴寡故黃帝作為君臣上下之義父子兄弟之禮夫
婦妃匹之合內行刀鋸外用甲兵故時變也由此觀
之神農非高於黃帝也然其名尊者以適於時也故
以戰去戰雖戰可也以殺去殺雖殺可也以刑去刑
雖重刑可以曆之能制天下者必先制其民者也能
勝強敵者必先勝其民者也故因民之本在制民若

治於金陶於土也本不堅則民如飛鳥禽獸其孰能
制之民本法也故善治者塞民以法而民地作矣名
尊地廣以至王者何故名卑地削以至於亡者戰罷
者也不勝而王不敗而亡者自古及今未嘗有也民
勇者戰勝也能一民於戰者民勇不能一民於戰者
民不勇聖王見王致之於兵也故興國而責之於兵
入其國觀其治兵用者強矣以知民之見用者也民
之見戰也如餓狼之見肉則民用矣凡戰者民之所
惡也能使民樂戰者王強國之民父遺其子兄遺其
弟妻遺其夫皆曰不得無返又曰失法離令若死我

死鄉治之行間無所逃遷徙無所入行間之治連以
五辯之以章束之令拙天所處罷此無所生是以三
軍之衆從令如流死而不旋踵國之亂也非其法亂
也非法不用也國皆有潛法而無使法必行之法國
皆有禁姦邪刑盜賊之法而無使姦邪盜賊必得之
法為姦邪盜賊者死刑而姦邪盜賊不止者不必得
必得而尚有姦邪盜賊者刑輕也刑輕者兼誅也必
得者失者衆也故善治刑不善而不賞善故不刑而
民善不刑而民善刑重也刑重者民不敢犯故無刑
也而民莫敢為非是一國皆善也故不賞善而民善

賞善之不可也猶賞不盜故善治者使跖可信而况伯夷乎不能治者使伯夷可疑而况跖乎勢不能為姦雖跖可信也勢得為姦雖伯夷可疑也國治或重明主在上所舉必賢則法可在賢法可在賢則法在下不肖不敢為非是謂重治不明主在上所舉必不肖國無明法不肖者敢為非是謂重亂兵或重強或重弱民固欲戰又不得不戰是謂重強民固不欲戰又得無戰是謂重弱明主不富貴其臣所謂富者非粟米珠玉也所謂貴者非爵位官職也廢法作私爵祿之富貴凡人主德行非上人也知非出人也勇力

非過人也然民雖有聖知弗敢謀勇力弗敢我殺雖衆不敢勝其主至民無億萬之數懸重賞而民不敢爭行罰而民不敢怨者法也國亂者民多私義兵弱者民多私勇則削國之所以取爵祿者多塗亡國之欲賤爵輕祿不作而食不戰而榮無爵而尊無祿而富無官而長此之謂姦民所謂治主無忠臣慈父無孝子欲無善言皆以法相司也命相正也不能獨為非而莫與人為非所謂富者入多而出寡衣服有制飲食有節則出寡矣女事盡於內男事盡於外則入多矣所謂明者無所不見則羣臣不敢為姦百姓不

敢為非是以人主處匡床之上聽絲竹之聲而天下
治所謂明者使衆不得不為所謂强者天下勝天下
勝是故合力是以勇強不敢為暴聖知不敢為詐而
虛用兼天下之衆莫敢不為其所好而辟其所惡所
謂强者使勇力不得不為已用其志足天下益之不
足天下說之恃天下者天下去之自恃者得天下得
天下者先自得者也能勝強敵者先自勝者也聖人
知必然之理必為之時勢故為必治之政戰必勇之
民行必聽之令是以兵出而無敵令行而天下朝黃
鵠之飛自行千里有必飛之備也麗麗臣臣每一日
走千里有必走之勢也虎豹熊羆而無敵有必勝之
理也聖人見本然之政知必然之理故其制民也如
以高下制水如以燥濕制火故曰仁者能仁於人而
不能使人仁義者能愛於人而不能使人相愛是以
知仁義之不足以治天下也聖人有必信之性又有
使天下不得不信之法所謂義者為人臣忠為人子
孝少長有禮男女有別非其義也餓不苟食死不苟
生此乃有法之常也聖王者不貴義而貴法法必明
令必行則已矣

商子卷五

境內第十九

四境之內丈夫女子皆有名於上者著死者削其有爵者乞無爵者以為庶子級乞一人其無役事也其庶子役其大夫。六日其役事也隨而養之軍爵自一級已下至小夫命曰校徒操出公爵自二級以上至不更命曰卒其戰也五人來簿為伍一人羽而輕其四人能人得一首則復夫勞爵其縣過三日有不致士大夫勞爵能五人一屯長百人一將其戰百將屯長不得斬首得三十三首以上盈論伯將屯長賜

爵一級五百主短兵五十人二五霸主將之主短兵
 百千石之令短兵百人八百之令短兵八十人七百
 之令短兵七十人六百之令短兵六十人國封尉短
 兵千人將短兵四千人戰及死吏而輕短兵能一首
 則優能攻城之邑斬首八千以上則盈論野戰斬首
 二千則盈論吏自操及杖以上大將盡賞行間之吏
 故爵公士也就為上造也故爵上造就為簪裹就
 為不更故爵為大夫爵吏而為縣尉則賜虜六加五
 千六百爵大夫而為國治就為大夫故爵大夫就為
 公大夫就為公乘就為五大夫則稅邑三百家故爵

五大夫皆有賜邑三百家有賜稅三百家爵五大夫
 有稅邑六百家者受客大將御參皆賜爵三級故客
 卿相論盈就正卿就為大庶長故大庶長就為左更
 故四更也就為大良造以戰故暴首三乃校三日將
 軍以不疑致士大夫勞爵其縣四尉訾由丞尉能得
 甲首一者賞爵一級益田一頃益宅九畝一除廢子
 一人乃得人兵官之吏其獄法高爵訾下爵級高爵
 能無給有爵人隸僕爵自二級以上有刑罪則貶爵
 自一級以下有刑罪則■小失死以上至大夫其官
 級一等其樹墓級一樹其攻城圍邑也國司空訾其

城之廣厚之數國尉分地以徒校分積尺而攻之為期曰先已者當為最國家已者訾為最殿再訾則廢內通則積薪積薪則燔柱陷隊之士面十八人之隊陷之士知疾鬪不得斬首隊五人則陷隊之士人賜爵一級死則一人後不能死之千人環規諫黥劓於城下國尉分地以中卒隨之將軍為木壹與國正監與王御史參望之其先入者舉為最口其後入者舉為最殿其陷隊也盡其幾者幾者不足乃以欲級益之

弱民第二十

民弱國強國強民弱故有道之國務在弱民樸則強淫則弱弱則軌淫則有志弱則有用有志則強故曰以強去強者弱以弱去強者強民善之則親利之用則和用則有任和則匱有任乃富於政上舍法任民之所善故姦多民貧則力富力富則淫淫則有蟲故民富而不用則使民以食出各必有力則農不偷農不偷六蟲無萌故國富而貧治重強兵易弱難強

■民樂生安佚死難難正易之則強事有羞多姦寡賞無失多姦疑敵失必利兵至強威事無羞利用兵九處利勢必王故兵行敵之所不敢行強事興敵之

所羞為利法有民安其次主變事能得齊國守安主操權利故主貴多變國貴少變利出一孔則國多物出十孔則國少物守一者治守十者亂治則強亂則弱強則物來弱則物去故國致物者強去物者弱民辱則貴爵弱則尊官貧則重賞以刑治民則樂用以賞戰民則輕死故戰事兵用曰強民有私榮則賤列卑官富則輕賞治民羞辱以刑戰則戰民畏死事亂而戰故兵農息而國弱農商官三者國之常食官也農闢地商致物官法民三官生蟲六曰歲曰食曰美曰好曰志曰行六者有樸必削農有餘食則薄燕於

歲商有淫利有美好傷器官設而不用志行為卒六蟲成俗兵必大敗法本治亂任善言多治衆國亂言多兵弱法明省任力言息治者國治言息兵強故治大國小治小國大政作民之所惡民弱政作民之所樂民強民強國羸民之所樂民強民強而強之兵重弱故民之所樂民強民強而弱之兵重強故以強重弱弱重強王以強政強弱弱存以弱政弱強強去強存則弱強去則王故以強政弱削以弱政強王也明主之使其臣也用必加於功賞必盡其勞人主使其民信如日月此無敵矣今離婁見秋毫之末不能以

明目易人烏獲舉千鈞之重不能以多力易人聖賢在體性也不能以相易也今當世之用事者皆欲為上聖舉法之謂也背法而治此任重道遠而無馬牛濟大川而無船楫也今夫人衆兵強此帝王之大資也苟非明法以守之也與危亡為鄰故明主察法境內之民無辟淫之心游處之士迫於戰陣萬民疾於耕農有以知其然也楚國之民齊疾而均速若飄風宛鉅鐵拖利若蜂蠆脅較犀兕堅若金石江漢以為池汝潁以為限隱以鄧林緣以方城秦師至鄢郢舉若振槁唐蔑死於垂涉莊躋發於內楚分為五地非不大也民非不衆也甲兵財用非不多也戰不勝守不固此無法之所生也釋權衡而操輕重者

禦盜第二十一

外內第二十二

民之外事難於戰故輕法不可以使之奚謂輕法其賞少而威薄淫道不塞之謂也奚謂淫道為辯智者貴游宦者任文學私名顯之謂也三者不塞則民不戰而事失矣故其賞少則聽者無利也威薄則犯者不害也故開淫道以誘之而以戰輕法戰之是謂設鼠而餌以狸也亦不幾乎故欲戰其民者必以重法

賞則必多威則必嚴淫道必塞為辯志者不貴游宦者不任文學私名不顯賞多威嚴民見戰賞之多則忘死見不戰之辱則苦生賞使之忘死而威使之苦生而淫道又塞以此遇敵是以百石之弩射飄葉也何不陷之有哉民之內事莫善於農故輕治不可以使之奚謂輕治其農貧而商富故其食賤者錢重食賤則農貧錢重則商富末事不禁則技巧之人利而游食者衆之謂也故農之用力最苦而贏利少不如商賈技巧之人苟能令商賈技巧之人無繁則欲國之無富不可得也故曰欲農富其國者境內之食必貴而不農之徵必多市利之租太重則民不得無田田不得不易其食食貴則田者利田者利則事者衆食貴糴食不利而又加重徵則民不得無去其商賈技巧而事地利矣故民之力盡在於地利矣故為國者邊利盡歸於兵市利盡歸於農邊利歸於兵者強市利歸於農者富故出戰而強入休而富者王也

君臣第二十三

古者未有君臣上下之時民亂而不治是以聖人列貴賤制爵位立名號以別君臣上下之義地廣民衆萬物多故分五官而守之民衆而姦邪生故立法制

為度量以禁之是故有君臣之義五官之分法制之禁不可不慎也處君位而令不行則危五官分而無常則亂法制設而私善行則民不畏刑君尊則令行官修則有常事法制明則民畏刑法制不明而求民之行令也不可得也夫民不從令而求君之尊也雖堯舜之智不能以治明主之治天下也緣法而治按功而賞凡民之所疾戰不避死者以求爵祿也明君之治國也士有斬首捕虜之功必其爵足榮也祿足食也農不離塵者足以養二親治軍事故軍士死節而農民不偷也今世君不然釋法而以智背功而以

譽故軍士不戰而農民流徙臣聞道民之門在上所先故民可令農戰可令游宦可令學問在上所與上以功勞與則民戰上以詩書與則民學問民之於利也若水於下也四旁無擇也民徒可以得利而為之者今上與之也瞋目扼腕而語勇者得垂衣裳而談說者得遲日曠久積勞私門者得尊向三者無功而皆可以得民去農戰而為之或談議而索之或事便辟而請之或以勇爭之故農戰之民日寡而游食者愈衆則國亂而地削兵弱而主卑此其所以然者釋法制而任名譽也故明主慎法制言不中法者不聽

也行不中法者不高也事不中法者不為也言中法則辯之事中法則為之行中法則高之故國治而地廣兵強而主尊此治之至也人君者不可不察也

禁使第二十四

人主之所以禁使者賞罰也賞隨功罰隨罪故論功察罪不可不審也夫賞高罰下而上無必知其道也與無道同也凡知道者勢數也故先王不恃其強而恃其信恃其數今夫飛蓬遇飄風而行千里乘風之勢也探淵者知千仞之深縣繩之數也故託其勢者雖遠必至守其數者雖深必得今夫幽夜山陵之大

而離婁不見清朝日艷則上別飛鳥下察秋毫故目之見也託日之勢也得勢之至不參官而潔陳數而物當今官恃多官衆吏官立丞監夫置丞立監者且以禁人之為利也而丞監亦欲為利則何以相禁故恃丞監而治者僅存之治也通數者不然別其勢難其道故曰其勢難匿者雖跖不為非焉故先王貴勢員曰人主執虛後以應則物應稽驗稽驗則姦得臣以為不然夫吏爵制決事於千里之外十二月而計書以定事以一歲別計而主以一聽見所疑焉不可蔽員不足夫物至則目不得不見言薄則耳不得不

聞故物至則變言至則論故治國之制民不得避罪
如目不能以所見遁心今亂國不然恃吏吏雖衆同
體一也夫同體一者相不可且夫利異而害不同者
先王所以為保也故至治夫妻交友不能相為棄惡
蓋非而不害於親民人不能相為隱上與吏也事合
而利異者也今夫騶虞以相監不可事合而利異者
也下缺二十八字若使馬馬能言則騶虞無所逃其
惡矣利異也利合而惡同者父不能以問子君不能
以問臣吏之與吏利合而惡同也夫事合而利異者
先王之所以為端也民之蔽主而不害 蓋賢者不
能益不肖者不能損故遺賢去智治之數也

慎法第二十五

凡世莫不以其所以亂者治故小治而小亂大治而
大亂人主莫能世治其民世無不亂之國奚謂以其
所以亂者治夫舉賢能世之所治也而治之所以亂
世之所謂賢者言正也所以為善正也黨也聽其言
也則公為能問其黨以為然故貴之不待其有功誅
之不待其有罪也此其執正使污吏有資而成其姦
險小人有資而施其巧詐初假吏民姦詐之本而求
端慤其末禹不能以使十人之衆庸主安能以御一

國之民彼而黨與人者不待我而有成事者也上舉一與民民倍主位而嚮私交倍主位而嚮私交則君弱而臣強君人者不察也非侵於諸侯必却於百姓彼言說之勢愚智同學之士學於言說之久則民釋實事而誦虛詞民釋實事而誦虛詞則力少而非多君人者不察也以戰必損其將以守必賣其城故有明主忠臣產於今世而散領其國者不可湏臾忘於破勝黨任節去言談任法而治矣使吏非法無以守則雖巧不得為姦使民非戰無以効其能則雖險不得詐夫以法相治以數相舉者不能相益訾言者不

能相損民見相譽無益相管附惡見訾言無損習相憎不相害也夫愛人者不阿憎人者不害愛惡各以其正治之至也臣故曰法任而國治矣千乘能以守者自存也萬乘能以戰者自完也雖桀為主不肯誑半辭以下其敵外不能戰內不能守雖堯為主不能以不臣諧謂所不若之國自此觀之國之所以重主之所以尊者力也於此二者力本而世主莫能致力者何也使民之所苦者無耕危者無戰二者孝子難以為其親忠臣難以為其君今欲毆其衆民與之孝子忠臣之所難臣以為非劫以刑而毆以賞莫可而

商子卷五
鼎耳階
今天世俗治者莫不釋法度而任辯慧後功力而進仁義民故不觸耕戰彼民不歸其力於耕即食屈於內不歸其節於戰則兵弱於外入而食屈於內出而兵弱於外雖有地萬里帶甲百萬與獨立平原一也且先王能令其民蹈白刃被矢石其民之欲為之非如學之所以避害故吾教令民之欲利者非耕不得避害者非戰不免境內之民莫不先觸耕戰而後得其所樂故地少粟多民少兵強能行二者於境內則霸王之道畢矣

定分第二十六

公問於公孫鞅曰法令以當時立之者明且欲使天下之吏民皆明知而用之如一而無私柰何公孫鞅曰為法令置官置吏樸足以知法令之謂者以為天下正則奏天子天子各主法令之皆降受命發官各主法令之民敢忘行主法令之所謂
志之法令名罪之主法令之吏有遷徙物故者則輒使學讀法令所謂為之程式使日數而知法令之所謂千中程為法令以罪之有敢剗定法令損益一字以上罪死不赦諸官吏及民有問法令之所謂於主法令之吏皆各以其故所欲問之法令明告之各為

尺六寸之符明書年月日時所問法令之名以告吏
民主法令之吏不告吏民之所問法令之所謂皆以
吏民之所問法令之罪各罪主法令之吏即以左券
予吏之問法令者主法令之吏謹藏其右券木柙以
室藏之封以法令之長印即後有物故以券書從事
法令皆副置一副天子之殿中為法令為禁室有鈇
鑰為禁而以封之內藏法令一副禁室中封以禁印
有擅發禁室印及入禁室視禁法令及禁劄一字以
上罪皆死不赦一歲受法令天子置三法官殿中置
一法官御史置一法官及吏丞相置一法官諸侯郡

縣皆各為置一法官及吏皆此秦一法官郡縣諸侯
一受寶來之法令學問并所謂吏民知法令者皆問
法官故天下之吏民無不知法者吏明知民知法令
也故吏不敢以非法遇民民不敢犯法以有法官也
遇民不修法則問法官法官即以法之罪告之民即
以法官之言正告之吏公知其如此故吏不敢以非
法遇民民又不敢犯法如此天下之吏雖有賢良辯
慧不能開一言以枉法雖有千金不能以用一銖故
智詐賢能者皆作而為善皆務自治奉公曰愚則易
治也此所生於法明白易知而必行法令者民之命

也為治之本也所以備民也為治而去法令猶欲無
饑而去食也欲無寒而去衣也欲東西行也其不幾
亦明矣一兔走百人逐之非以兔也夫賣者滿市而
盜不敢取由名分已定也故名分未定堯舜禹湯且
皆如物而逐之名分已定貧盜不取今法令不明其
名不定天下之人得議之其議人異而無定人主為
法於上下民議之於下是法令不定以下為正也此
所謂名分之不定也夫名分不定堯舜猶將折而姦
之而况衆人乎此令姦惡大起人主奪威勢之國滅
社稷之道也今先聖人為書而傳之後世必師受之
乃知所謂之名不師受之而人以其心意議之至死
不能知其名與其意故聖人必為法令置官也置吏
也為天下師所以定名分也名分定則大詐貞信民
皆愿慤而名自治也故夫名分定勢治之道也名分
不定勢亂之道也故勢治者不可亂世亂者不可治
夫世亂而治之愈亂勢治而治之則治故聖王治治
不治亂夫微妙意志之言上智之所難也夫不待法
令繩墨而無不正者千萬之一也故聖人以千萬治
天下故夫智者而後知之不可以為法民不盡知賢
者而後知之不可以為法民不盡賢故聖人為法必

商子卷五
使之明白易知名正愚知徧能知之為置法官置主
法之吏以為天下師令萬民無陷於險危故聖人立
天下而無刑死者非不刑殺也行法令明白易知為
置法官吏為之師以道之知萬民皆知所避就避禍
就福而皆以自治也故明主因治而終治之故天下
大治也

商子卷五終

慎子

按漢志四十二篇唐志十卷滕輔注今纔五篇非
全書也周氏涉筆稱屏去繆悠剪削枝葉本道而
附於情主法而責於上五篇雖簡約而明白純正
統本貫末則全書宋時已亡逸矣馬氏意林掇取
十二條具不見五篇中蓋采諸全書者今錄以附
篇末云萬曆丁丑夏日余有丁志

目錄

威德一
因循二
民雜三
德立四
君人五
意林附

慎子

威德一

天有明不憂人之暗地有財不憂人之貧聖人有德不憂人之危也天雖不憂人暗闢戶牖必取已明焉則天無事也地雖不憂人貧伐木刈草必取已富焉則地無事也聖人雖不憂人之危百姓準上而比於下其必取已安焉則聖人無事也故聖人處上能無害人不能使人無已害也則百姓除其害矣聖人之有天下也愛之也非敢取之也百姓之於聖人也養之也非使聖人養已也則聖人無事古者工不兼事

士不兼官工不兼事則事省省則易勝士不兼官則職寡寡則易守故士位可世工事可常百工之子不學而能者非生巧也言有常事也今也國無常道官無常法是以國家日繆教雖成官不足官不足則道理匱矣古者立天子而貴者非以利一人也曰天下無一貴則理無由通通理以為天下也故立天子以為天下非立天子以為天子也立國君以為國非立國以為君也立官長以為官非立官以為官長也法雖不善猶愈於無法所以一人之心也夫投鈎以分財換策以分焉非鈎策為均也使得美者不知所以美

使得惡者不知所以惡此所以塞願望也明君動事
分職由慧定功分財由法行德制中由禮故欲不得
干時愛不得犯法貴不得踰親祿不得踰位士不得
兼官二不得兼事以能受事以事受利若是者上無
羨賞下無羨財

因循二

天道因則大化則細因也者因人之情也人莫不自
為也化而使之為我則莫可得而用是故先王不受
祿者不臣不厚祿者不與入人不得其所以自為也
則上不取用焉故用人之自為不用人之為我則莫
不可得而用矣此謂之因

民雜三

民雜處而各有所能者不同此民之情也大君者大
上也兼畜下者也下之所能不同而皆上之用也是
以大君因民之能為資盡包而畜之無能取去焉是
故又執於方以求於人故所求者無一足也大君不
擇其下故足不擇其下則為下易矣易為下則莫不
容容故多下多下之謂大上君臣之道臣有事而君
無事也君逸樂而臣任勞臣盡智力以善其事而君
無與焉仰成而已事無不治治之正道然也人君自

任而務為善以先下則是代下負任蒙勞也臣反逸
矣故曰君人者好為善以先下則下不敢與君爭善
以先君矣皆稱所知以自覆掩有過則臣反責君逆
亂之道也君之智未必最賢於衆也以未最賢而欲
善盡被下則下不贍矣若君之智最賢以一君而盡
贍下則勞勞則有倦倦則衰衰則復返於人不贍之
道也是以人君自任而躬事則臣不事事也是君臣
易位也謂之倒逆倒逆則亂矣人君任臣而勿自躬
則臣事事矣是君臣之順治亂之分不可不察也

德立四

立天子不使諸侯疑立諸侯不使大夫疑立正妻不
使群妻疑立嫡子不使庶孽疑疑則動兩動兩則爭
雜則相傷害在有與不在獨也故臣有兩位者國必
亂臣兩位國不亂者君在也恃君不亂矣失君則亂
子有兩位者家必亂子兩位而不亂者父在也恃父
不亂矣失父則亂臣疑君而無不危國孽疑宗而無
不危家

君人五

君人者舍法而以身治則誅賞予奪從君心出然則
受賞者雖當望多無窮受罰者雖當望輕無已君舍

法以心裁輕重則同功殊賞同罪殊罰矣怨之所由生也是以分馬之用策分田之用鈎非以策鈎為過於人智所以去私塞怨也故曰大君任法而弗躬則事斷於法法之所加各以分蒙賞罰而無望於君是以怨不生而上下和矣

意林引載十二條附後

小人食於力君子食於道○詩往志也書往誥也春秋往事也○愛赤子不慢其保絕險者不慢其御○措鈎石使禹察之不能識也懸於權衡則鬢髮識矣○兩貴不相事兩賤不相使家富則踈族家貧則兄

弟離○不聰不明不能王不聳不聾不能公海與山爭水海必得之○有權衡者不可欺以輕重有尺寸者不可差以長短有法度者不可巧以詐偽○一兔走百人追之積兔於市過而不顧非不欲兔分定不可爭也○孝子不生慈父之家忠臣不生聖君之下○匠人成棺不憎人死利之所在忘其醜也○廊廟之材非一木之枝狐白之裘非一狐之腋○蔽甲之國必有兵遁市人可驅而戰安國之兵不由忿起

鄧析子

中鄧析書四篇臣叙書一篇凡中外書五篇以相校
 除復重為一篇皆定殺叙而書可繕寫也鄧析者鄭人
 也好刑名操兩可之說設無窮之辭當子產之世數
 難子產之法記或云子產起而戮之於春秋左氏傳
 昭公二十年而子產卒子太叔嗣為政定公八年太
 叔卒駟歆嗣為政明年乃殺鄧析而用其竹刑君子
 謂子歆於是乎不忠苟有可以加於國家棄其邪可
 也靜女之三章取彤管焉竿蕤何以告之取其忠也
 故用其道不棄其人詩之蔽芾甘棠勿剪勿伐召伯

所羨思其人猶愛其樹也况用其道不恤其人乎然
無以勸能矣竹刑簡法也久遠世無其書子產卒後
二十年而鄧析死傳說或稱子產誅鄧析非也其論
無厚者言之異同與公孫龍同類謹上

崇文總目鄧析著書二篇漢志二篇劉向書目一
篇歆復校為二篇

晁氏曰析之學蓋兼名法家也其大旨訐而刻其
間時剽取他書頗駁雜不倫豈後人附益之與

目錄

無厚篇

轉辭篇

鄧析子

無厚篇

天於人無厚也君於民無厚也父於子無厚也兄於
弟無厚也何以言之天不能屏勃厲之氣全夭折之
人使為善之民必壽此於民無厚也凡民有穿窬為
盜者有詐偽相迷者此皆生於不足起於貧窮而君
必執法誅之此於民無厚也堯舜位為天子而丹朱
商均為布衣此於子無厚也周公誅管蔡此於弟無
厚也推此言之何厚之有

循名責實君之事也奉法宣令臣之職也下不得自

擅上操其柄而不理者未之有也君有三累臣有四
責何謂三累惟親所信一累以名取士二累近故親
疎三累何謂四責受重賞而無功一責居大位而不
治二責理官而不平三責御軍陣而奔北四責君無
三累臣無四責可以安國

勢者君之輿威者君之策臣者君之馬民者君之輪
勢固則輿安威定則策勁臣順則馬良民和則輪利
為國失此必有覆車奔馬折輪敗載之患安得不危
異同之不可別是非之不可定白黑之不可分清濁
之不可理久矣誠聽能聞於無聲視能見於無形計

能規於禾兆慮能防於未然斯無他也不以耳聽則
通於無聲矣不以目視則照於無形矣不以心計則
達於無兆矣不以知慮則合於未然矣君者藏形匿
影群下無私掩目塞耳萬民恐震

循名責實察法立威是明王也夫明於形者分不遇
於事察於動者用不失則利故明君審一萬物自定
名不可以外務智不可以從他求諸已之謂也

治世位不可越職不可亂百官有司各務其刑上循
名以督實下奉教而不違所美觀其所終所惡計其
所窮喜不以賞怒不以罰可謂治世

夫負重者患塗遠據貴者憂民離負重塗遠者身疲而無功在上離民者雖勞而不治故智者量塗而後負明君視民而出政

獵羆虎者不於外國釣鯨鯢者不居清池何則國非羆虎之窟也池非鯨鯢之泉也楚之不泝流陳之不東策麾長廬之不士呂子之蒙耻

夫游而不見敬不恭也居而不見愛不仁也言而不見用不信也求而不能得無始也謀而不見喜無理也計而不見從遺道也因勢而發譽則行等而名殊人齊而得時則力敵而功倍其所以然者乘勢之在

外推辯說非所聽也虛言向非所應也無益亂非舉也故談者別殊類使不相害序異端使不相亂論志通意非務相乖也若飾詞以相亂匿詞以相移非古之辯也

慮不先定不可以應卒兵不閑習不可以當敵廟筭千里帷幄之奇百戰百勝黃帝之師

死生命命貧富命時怨天折者不知命也怨貧賤者不知時也故臨難不懼知天命也貧窮無懼達時序也凶饑之歲父死於室子死於戶而不相怨者無所

顧也同舟渡海中流遇風救患若一所憂同也張羅

而畋唱和不差者其利等也故體痛者口不能不呼
心悅者顏不能不笑責疲者以舉千鈞責兀者以及
走兔驅逸足於庭求獲捷於檻斯逆理而求之猶倒
裳而索領

事有遠而親近而踈就而不用去而反求風此四行
明主大憂也

夫水濁則無掉尾之魚政苛則無逸樂之士故令煩
則民詐政擾則民不定不治其本而務其末譬如拯
溺錘之以石救火投之以薪

夫達道者無知之道也無能之道也是知大道不知
而中不能而成無有而足守虛責實而萬事畢忠註
於不忠義生於不義音而不收謂之放言出而不督
謂之闇故見其象致其形循其理正其名得其端知
其情若此何往不復何事不成有物者意也無外者
德也有人者行也無人者道也故德非所履處非所
處則失道非其道不道則諂意無賢慮無忠行無道
言虛如受實萬事畢

夫言榮不若辱非誠辭也得_而不若失非實談也不進
則退不喜則憂不得則亡此世人之常真人危斯十
者而為一矣所謂大辯者別天下之行具天下之物

選善退惡時措其宜而功立德至矣小辯則不然別
言異道以言相射以行相伐使民不知其要無他故
焉故淺知也君子并物而錯之兼塗而用之五味未
嘗而辨於口五行在身而布於人故何方之道不從
面從之義不行治亂之法不用悒然寬裕蕩然簡易
略而無失精詳之纖微也

夫舟浮於水車轉於陸此自然道也有不治者知不
豫焉

夫木擊折轉水戾破舟不怨木石而罪巧拙故不載
焉故有知則惑有心則嶮有目則眩是以規矩一而
不易不為秦楚緩節不為胡越改容一而不邪方行
而不流一日形之萬世傳之無為為之也

夫自見之明借人見之闇也自聞之聰借人聞之聾
也明君知此則去就之分定矣為君當若冬日之陽
夏日之陰萬物自歸莫之使也恬卧而功自成優游
而政自治豈在振目搯腕手據鞭朴而後為治歟
夫合事有不合者知與未知也合而不緝者陽親而
陰踈故遠而親者忘相應也近而踈者忘不合也就
而不用者策不得也去而反求者無違行也近而不
御者心相乖也遠而相思者合其謀也故明君擇人

不可不審士之進趣亦不可不詳

轉辭篇

世間悲哀喜樂嗔怒憂愁又惑於此今轉之在已為
哀在他為悲在已為樂在他為喜在已為嗔在他為
怒在已為愁在他為憂在已若扶之與携謝之與議
故之與右新諾之與已相去千里也夫言之術與智者
言依於博與博者言依於辯與辯者言依於安與貴
者言依於勢與富者言依於豪與貧者言依於利與
勇者言依於敢與愚者言依於說此言之術也不用
在早圖不窮在早稼非所宜言勿言非所宜為勿為

以避其危非所宜取勿取以避其咎非所宜爭勿爭
以避其聾一聲而非駟馬勿追一言而急駟馬不及
故惡言不出口苟語不留耳此謂君子也

夫任臣之法闇則不任也慧則不從也仁則不親也
勇則不近也信則不信也不以人用人故謂之神怒
出於不怒為出於不為視於無有則得其所見聽於
無聾則得其所聞故無形者有形之本無聲者有聲
之母循名責實實之極也按實定名名之極也參以
相平轉而相成故得之形名

夫川竭而谷虛丘夷而淵實聖人以死大盜不起天

下平而故也聖人不死大盜不止何以知其然為之
斗斛而量之則并斗斛而均之為之權衡以平之則
并與權衡而竊之為之符璽以信之則并與符璽而
竊之為之仁義以教之則并仁義以竊之何以知其
然彼竊財誅竊國者為諸侯諸侯之門仁義存焉是
非竊仁義邪故遂於大盜霸諸侯此重利也盜耻所
不可禁者乃聖人之事也欲之與惡善之與惡四者
變之失恭之與儉敬之與傲四者失之脩故善素朴
任慤憂而無失未有脩焉此德之永也言有信而不
為信言有善而不為善者不可不察也

夫治之法莫大於私不行功莫大於使民不爭今也
立法而行私與法爭其亂也甚於無法立君而爭愚
與君爭其亂也甚於無君故有道之國則私善不行
君立而愚者不尊民一於君事斷於法此國之道也
明君之督大臣緣身而責名緣名而責形緣形而責
實臣懼其重誅之至於是不敢行其私矣

心欲安靜慮欲深遠心安靜則心策生慮深遠則計
謀成心不欲躁慮不欲淺心躁則精神滑慮淺則百
事傾治世之禮簡而易行亂世之禮煩而難遵上古
之樂質而不悲當今之樂邪而為淫上古之民質而

敦朴今世之民詐而多行上古象刑而民不犯教有
 墨劓不以為恥斯民所以亂多治少也堯置敢諫之
 鼓舜立誹謗之木湯有司直之人武有戒慎之銘此
 四君子者聖人也而猶若此之勤至於栗陸氏殺東
 里子宿沙氏戮箕文桀誅龍逢紂剗比干四主者亂
 君故其疾^疾賤若仇是以賢愚之相覺若百丈之谿與
 萬仞之山若九地之下與重山^天之顛
 明君之御民若御奔而無轡履冰而負重親而踈之
 踈而親之故畏儉則福生驕奢則禍起聖人逍遙一
 世罕匹萬物之形寂然無鞭朴之罰莫然無叱咤之

聲而家給人足天下太平視昭昭知冥冥推未運觀
 未然故神而不可見幽而不可見^窺此之謂也

君人者不能自專而好任下則智日困而數日窮迫
 於下則不能申行隨於國則不能持^智知不足以為治
 威不足以行誅無以與下交矣故喜而使賞不必當
 功怒而使誅不允值罪不慎喜怒誅賞從其意而欲
 委任臣下故亡國相繼殺君不絕古人有言衆口鑠
 金三人成虎不可不察也

夫人情發言欲勝舉事欲成故明者不以其短疾人
 之長不以其拙病人之工言有善者則^明而賞之言有

非者顯而罰之塞邪枉之路蕩淫辭之端臣下閔之
左右結之古可謂明君為善者君與之賞為惡者君與
之罰因其所以來而報之循其所以進而答之聖人
因之故能用之因之循理故能長久今之為君無堯
舜之才而慕堯舜之治故終顛殞乎混冥之中而事
不覺於昭明之術是以虛慕欲治之名無益亂世之
理也

患生於官成病始於少瘳禍生於懈慢孝衰於妻子
此四者慎終如始也富必給貧壯必給老快情恣欲
必多侈侮故曰尊貴無人以高人聰明無以寵人資給

無以先人剛勇無以勝人能履行此可以為天下君
夫謀莫難於必聽事莫難於必成成必合於數聽必
合於情故抱薪加火燥者必先燃平地注水濕者必
先濡故曰動之以其類安有不應者獨行之術也
明君立法之後中程者賞缺繩者誅此之謂君曰亂
君國曰亡國

智者寂於是非故善惡有別明者寂於去就故進退
無類若智不能察是非明不能審去就斯謂虛妄
目貴明耳貴聰心貴公意以天下之目視則無不見以
天下之耳聽則無不聞以天下之智慮則無不知得

此三術則存於不為也

庚午五月二十七日據明鈔該鄂本校沈未記



鄧析子終



